



Broj: 01-02-26-042-4-II/2009
Sarajevo:16.02.2010.godine

Na osnovu člana 32. stav (1) i (2) Zakona o konkurenciji ("Službeni glasnik BiH", broj 48/05, 76/07 i 80/09) i člana 210. Zakona o upravnom postupku ("Službeni glasnik BiH", broj 29/02, 44/02, 12/04 i 88/07), postupajući po zahtjevu broj 01-02-26-042-II/09 od 31.12.2009. godine, podnesenom od strane privrednih subjekata: "AL-EX" d.o.o. Sarajevska bb, 72000 Zenica, "Secom" d.o.o. Mulići bb, 71300 Visoko, "SILVESTRA" d.o.o. Alije Izetbegovića F-1, 72240 Kakanj, "AM-MI" d.o.o. Rojin Potok bb, 72240 Kakanj, "BUDO EXPORT" d.o.o. Grabovica bb, 72230 Žepče i "LAZE" d.o.o. Brnjić 3, 72240 Kakanj, putem punomoćnika, advokata, Nedžada Babića, Masarikova 17, 72000 Zenica, protiv privrednog subjekta Šumsko privredno društvo ZE-DO Kantona Zavidovići, Alije Izetbegovića 25, 72220 Zavidovići, zbog sumnje o postojanju zloupotrebe dominantnog položaja u smislu člana 10. stav 2. tačka a), b) i c) Zakona o konkurenciji, Konkurencijsko vijeće na 102. sjednici održanoj 16.02. 2010.godine, donijelo je

ZAKLJUČAK **o pokretanju postupka**

- (1) Pokreće se postupak po Zahtjevu za pokretanje postupka privrednih subjekata: "AL-EX" d.o.o. Sarajevska bb, 72000 Zenica, "Secom" d.o.o. Mulići bb, 71300 Visoko, "SILVESTRA" d.o.o. Alije Izetbegovića F-1, 72240 Kakanj, "AM-MI" d.o.o. Rojin Potok bb, 72240 Kakanj, "BUDO EXPORT" d.o.o. Grabovica bb, 72230 Žepče i "LAZE" d.o.o. Brnjić 3, 72240 Kakanj, broj:01-02-26-042-ii/09 od 31.12.2009. godine, protiv privrednog subjekta Šumsko privredno društvo ZE-DO Kantona Zavidovići, Alije Izetbegovića 25, 72220 Zavidovići, zbog sumnje o postojanju zloupotrebe dominantnog položaja na relevantnom tržištu prodaje drvnih sortimenata, ograničavanjem tržišta i primjenom različitih uslova za iste vrste roba, u smislu člana 10. stav 2. tačka a), b) i c) Zakona o konkurenciji.
- (2) Postupak će se provesti u skladu sa Zakonom o konkurenciji i podzakonskim aktima koji regulišu oblast tržišne konkurencije i drugim relevantnim propisima.
- (3) Strane u postupku i druga pravna i fizička lica obavezna su na zahtjev Konkurencijskog vijeća dostaviti svu traženu dokumentaciju u smislu člana 33. i 35. Zakona o konkurenciji.

Obrazloženje

Konkurencijsko vijeće je dana 31.12.2009.godine pod brojem 01-02-26-042-II/09 primilo Zahtjev za pokretanje postupka, podnesen od strane privrednih subjekata: "AL-EX" d.o.o. Sarajevska bb, 72000 Zenica, "Secom" d.o.o. Mulići bb, 71300 Visoko, "SILVESTRA" d.o.o. Alije Izetbegovića F-1, 72240 Kakanj, "AM-MI" d.o.o. Rojin Potok bb, 72240 Kakanj, "BUDO EXPORT" d.o.o. Grabovica bb, 72230 Žepče i "LAZE" d.o.o. Brnjić 3, 72240 Kakanj (u daljem tekstu: Podnosioci zahtjeva), putem punomoćnika, advokata, Nedžada Babića, Masarikova 17, 72000 Zenica, protiv privrednog subjekta Šumsko privredno društvo ZE-DO Kantona Zavidovići, Alije Izetbegovića 25, 72220 Zavidovići u (daljem tekstu: ŠPD ZDK-a), zbog sumnje o postojanju zloupotrebe

dominantnog položaja na relevantnom tržištu prodaje drvnih sortimenata, ograničavanjem tržišta i primjenom različitih uslova za iste vrste roba, u smislu člana 10. stav 2. tačka a), b) i c) Zakona o konkurenciji (u daljem tekstu: Zakona).

Uvidom u dostavljeni Zahtjev Konkurencijsko vijeće je utvrdilo da isti nije potpun, te je u skladu sa članom 2 tarifni broj 106. stav (1) tačka e) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", broj 30/06), obavijestilo Podnosiocima zahtjeva o obavezi uplate administrativne takse dana 19.01.2010.godine aktom, broj: 01-02-26-042-1-II/2009. Podnosioci zahtjeva su postupili po zahtjevu Konkurencijskog vijeća i dokaz o uplati iste dostavili Konkurencijskom vijeću dana 27.01.2010.godine, aktom broj: 01-02-26-042-2-II/2009.

Potvrda o kompletnom u urednom Zahtjevu , shodno članu 28.stav (3), izdana je dana 15.02.2010.godine pod brojem 01-02-26-042-3-II/2009.

Podnosioci zahtjeva su privredni subjekti čija je osnovna djelatnost prerada drveta i isti svake godine, do sada su, kontinuirano sklapali ugovore o sukcesivnoj isporuci pilanskih trupaca sa privrednim subjektom ŠPD ZDK-a.

Međutim, ŠPD ZDK-a je u 2009. Godine Podnosiocima zahtjeva, dostavilo nacрте ugovora o kupoprodaji drvnih sortimenata lišćara (u daljem tekstu: Ugovori), kojim ugovori su bili različiti od ranijih ugovora i od ugovora koji su ponuđeni drugim privrednim subjektima, radi čega Podnosioci zahtjeva nisu prihvatili iste, iznoseći pismene razloge zašto ne prihvataju.

Podnosiocima zahtjeva, kao pojedinačnim kupcima, ponuđene su količine trupaca bukve u izuzetno malim količinama za 2009.godinu u odnosu na prethodne godine, a za neke od privrednih subjekata i po pet puta manje, dok privrednim subjektima "AM-MI" d.o.o. i "SILVESTRA" d.o.o. Kakanj, uopšte nisu ponuđeni trupci za 2009.godinu, iako su isti privredni subjekti imali zaključene ugovore u 2008. godini i istima su bili isporučivani bukovi trupci.

Ovako ponuđene količine, a imajuću u vidu proizvodne procese Podnosioca zahtjeva, uopšte ne mogu zadovoljiti svoje potrebe, niti ispuniti svoje obaveze prema kupcima, naročito su u teškom položaju privredni subjekti kojima bukovi trupci nisu ni ponuđeni.

Podnosioci zahtjeva ističu da je osnovni razlog koji je opredijelio ŠPD ZDK-a, da ponudi ovako male količine, odnosno da ne ponudi bilo kakve količine, je taj što je novoosnovanom privrednom subjektu "Krivaja 1884" Zavidovići, dao 4/5 proizvodnje bukovih trupaca i na taj način direktno ugrozio poslovanje Podnosilaca zahtjeva, koji su sada dovedeni u potpuno bezizlaznu situaciju, jer ne mogu otplaćivati anuitete podignutih kredita za opremu, isplaćivati zaposlene itd.

Stoga su Podnosioci zahtjeva tražili od ŠPD ZDK-a da se ponuđeni ugovori izmijene i da im se u toku 2009.godine isporuče bukovi trupci u količinama koje minimalno odgovaraju prosječnim količinama isporučenih trupaca u protekle tri godine, imajući u vidu dosadašnje međusobno poslovanje. Međutim, i pored obećanja od strane ŠPD ZDK-a da će Podnosiocima zahtjeva ponuditi bolje uslove nabavke bukovih trupaca to se nije desilo u 2009. godini , iako su u međuvremenu Podnosioci zahtjeva zaključili ugovore sa svojim kupcima o isporuci svojih proizvoda.

Postupanjem ŠPD ZDK-a na ovakav način, Podnosioci zahtjeva dovedeni su u izuzetno težak i neravnopravan položaj, u odnosu na privredni subjekat "Krivaja 1884" Zavidovići, koji ima enormno povoljnije uslove po zaključenom Ugovoru, a što je i potpuno suprotno Odluci Vlade

Federacije broj: 140/08 od 28.02.2008.godine, kojom se za sve kupce šumskih drvnih sortimenata moraju obezbijediti isti uslovi prodaje.

Međutim, Podnosioci zahtjeva bili su prinuđeni potpisati ponuđene Ugovore koji su daleko nepovoljniji u odnosu na uslove o isporuci istih sortimenata, privrednom subjektu "Krivaja 1884" Zavidovići. ŠPD ZDK -a, sklopilo je sa „Krivaja 1884.“Ugovor za period od čak 6 godina, po cijeni sirovine jeftinije za 25% u odnosu na Podnosiocima zahtjeva, sa odgodom plaćanja do 90 dana, te sa garantovanim velikim mjesečnim količinama uz mjeru osiguranja plaćanja razlike između ugovorene i pune tržišne cijene drvnih sortimenata za količinu od 8.000 m³ mjesečno za period od 6 godina u prosječnom mjesečnom iznosu od cca 10.000 KM, koji iznos je obavezna snositi Vlada FBiH.

Odluka Vlade Federacije broj: 140/08 od 28.02.2008.godine o opštim uslovima prodaje šumskih drvnih sortimenata iz državnih šuma na teritoriji FBiH, izričito propisuju da se svim kupcima drvnih sortimenata moraju obezbijediti isti uslovi, što očito nije poštovano prilikom zaključivanja Ugovora o isporuci drvnih sortimenata zaključenog između privrednog subjekta ŠPD ZDK-a i novoosnovanog privrednog subjekta "Krivaja 1884" Zavidovići, jer su uslovi iz navedenog Ugovora mnogo povoljniji nego uslovi iz Ugovora koje je ŠPD ZDK-a zaključilo sa Podnosiocima zahtjeva.

Takođe, Podnosioci zahtjeva ističu da ŠPD ZDK-a u svom pismenom odgovoru na navedene primjedbe, nikada nije obrazložilo razloge, zašto je Ugovor sa privrednim subjektom "Krivaja 1884" Zavidovići, zaključen po enormno povoljnijim uslovima u odnosu na Ugovore zaključene sa Podnosiocima zahtjeva. Pored toga iako Podnosioci zahtjeva redovno izmiruju obaveze po zaključenim Ugovorima, ŠPD ZDK-a je obustavilo sukcesivnu isporuku bez ikakvog razloga, a nastavilo isporučivati drvene sortimente privrednom subjektu "Krivaja 1884" Zavidovići. Ovo je još jedan od razloga kojim su Podnosiocima zahtjeva dovedeni u nepovoljniji položaj u odnosu na privredni subjekt "Krivaja 1884".

Na osnovu navedenog, Podnosioci zahtjeva smatraju da je ŠPD ZDK-a zloupotrebilo dominantan položaj na relevantnom tržištu prodaje drvnih sortimenata, ograničavanjem tržišta i primjenom različitih uslova za iste vrste roba, prema Podnosiocima Zahtjeva, u smislu člana 10. stav 2. tačka a), b) i c) Zakona. i traže od Konkurencijskog vijeća da privrednom subjektu ŠPD ZDK-a izrekne i novčanu kaznu zbog zloupotrebe dominantnog položaja u smislu člana 10. stav 2) tačka a), b) i c) Zakona, te da u što kraćem roku donese odluku, kako bi Podnosioci zahtjeva pri sklapanju Ugovora za 2010.godinu imali istovjetne uslove kao i privredni subjekt "Krivaja 1884" Zavidovići, odnosno da naloži ŠPD ZDK-a zaključivanje Ugovora na vremensko razdoblje od najmanje 5 godina pod jednaki uslovima utvrđenim u zaključenom Ugovoru sa privrednim subjektom "Krivaja 1884" Zavidovići.

Konkurencijsko vijeće je na osnovu navoda iz Zahtjeva i dostavljene dokumentacije, ocijenilo da povrede Zakona, na koje Podnosioci zahtjeva ukazuju nije moguće utvrditi bez provođenja postupka, te je odlučilo kao u dispozitivu ovog Zaključka.

Nakon provedenog postupka Konkurencijsko vijeće će donijeti rješenje u skladu sa članom 42. Zakona o konkurenciji.

Pouka o pravnom lijeku

Protiv ovog zaključka nije dopuštena žalba. Nezasadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema istog.

Predsjednik

dr.Stjepo Pranjić

Dostaviti:

- Podnosiocima zahtjeva,
- privrednom subjektu Šumsko privredno društvo ZE-DO Kantona Zavidovići,
- U spis
- a/a

*Bosna i Hercegovine, 71000 Sarajevo, Radićeva,
Tel: + 387 33 251 406, Faks: + 387 33 251 408
<http://www.bihkonk.gov.ba/>*